



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Joe Biden-i policy kar melenshitsu;
Paris Accord nung adentsu

TAPAK 10

Thailand Open: Sameer
Verma quarter-i iogo

VOL. XVIII NO. 98 (ADOK 98) DIMAPUR

ROGONÜ (THURSDAY) AENJETI (JANUARY) 22, 2021

₹ 5.00

Nagaland nung health worker 4000 jungnua mozü agiogo

Kohima, Aenjeti/January 21 (TYO): Bodhbarnü health worker 1,097 nem coronavirus mozü agütsüogo aser ibaji ajanga tang state nung iba mozü agir nisung 3,970 jungogo, ta state health ketdangsürtemi ashi.

Tanü Healthcare nung inyaker nem mozü agütsüba sentong takok ngua agiogo, kechiaser state nung tanü iba mozü agütsütsü nükjidong ayuba shilem 73 agütsüetogo, ta State Immunization Officer (SIO), Dr Ritu Thurr-i ashi.

Mozü agirtem rongnung Principal Director, Health and Family Welfare Department, Dr. Vizolie Z Suokhrie aser Mission Director, National Health Mission, Dr. Kevichusa Medikhu na dena liasü. State kübok session site 41 nung timtem majurui mozü agütsüba osang aruogo, ta pai ashi.

SIO ajangasa ashiba agi, Ministry of Health and Family Welfare nungi yokba COVID-19 mozü (covishield) consignment tanabuba, doses 23,000 Vodhbarnü Dimapur airport atong aser police temi tanükba agüja state vaccine store tongogo.

Directorate of Health and Family

Welfare ajanga district tem dang COVID-19 mozü ya Hombar, Mongulbar aser Bodhbarnü totuyuba agütsüogo aser Kohima district kübok session site ya Botsa PHC, Viswema CHC, Kemipfuphe PHC, Kezocha PHC, Kohima Village PHC, Zakhama PHC, Zakhama Army hospital aser Mon district nung Aboi HC aser Thomching PHC nung alitsü temelaba agütsüogo, ta pai metetdaksü.

Vaccination drive mezüing noklem nung sorkar, nika, military aser paramilitary doctors, nurses aser sanitary workers tem densema healthcare worker 19,690 targeted population liasü.

Bodhbarnü district balala nung doctor, nurse aser support staff densema healthcare worker 1,415 nem mozü agütsüba telemsa yamai alitsü: Mokokchung - 320, Kohima - 167, Phek - 128, Dimapur - 127, Zunehboto - 125, Mon - 105, Tuensang - 52, Wokha - 46, Kiphire - 14 aser Peren - 13.

Mozü agir aliba healthcare worker ajunga nem tanabuba sode ya anogo 28 lir agütsütsü aser mozü agiba sülena COVID-19 dak sendakba yimyatam timi amshitsu, ta Dr. Thurr-isa metetdaksü.

India nulIndia nunger mozü yangludak mi lendong atalok

Pune, Aenjeti/January 21 (Agencies): Serum Institute of India indang ki nung mi adoka nisung takum samaba atema Ato Kilonser Narendra Modi-i Brehostibarnü mangyim tejashi lemsatopogo. Maharashtra state kübok Pune yimti nung iba lendong atalokba nung nisung pongu asü, ta police-i ashi.

"@SerumInstIndia nung tia maka mi lendong ataloka nisung takum laluba atema temolung shiranger. Tang tejashi mapang asür kinungertem den ni dena lir. Yirur alirtem tekeratiba nung taneptsü angutsü sarasademsür," ta Modi-i Twitter nung zülutsü. Taoba küm November ita Modi-i iba Serum Institute of India (SII) ya semdanga liasü.

Iba mi adokba ya ajanga Covishield mozü yangluba nung mokongshitsu, ta Serum Institute of India CEO Adar Poonawalla-i ashi. Asür kibong shia nem teyari sen lakh 25 agütsütsü, ta pai metetdaksü.

Cooling operation mapang nisung tasü mang pongu ya mi

remseper temi ngutet, ta Mayor Murlidhar Mohol-i ashi. Iba lendong atalokba kuli bushitsu atema state sorkari totuyuba agütsüogo, ta Maharashtra Deputy Chief Minister Ajit Pawar-i ashi.

Nikongdang 2:45 ako nung mi ya iba ki indang floor pezübuba aser pongububa nung adoka liasü, aser ghonda ana nung remseptet, ta police-i ashi.

Iba mi remseptsü atema water takner 15 amshi aser nikongdang 4:30 ako meta remseptet, ta Chief Fire Officer Prashant Ranpise-i ashi.

"Mi adokba ya ano mejangja. Furniture, wiring, cabin tem rongdokogo. Gol aser osetsüset tongtipangtem meraksa," ta pai ashi.

Serum Institute of India Pvt Ltd ya doses yangluba aser alima nung ayokba (doses billion 1.5 dak tema) tsütsü alima nung mozü yanglur tulutiba lir, kong Polio mozü aser Diphtheria, Tetanus, Pertussis, Hib, BCG, r-Hepatitis B, Measles, Mumps aser Rubella mozütem yanglur

CM Rio-i Green Park nung Public Recreational Center semzüksü



Nagaland Chief Minister Neiphiu Rio-i January 21, 2021 nü Green Park, State Horticulture Nursery Dimapur nung Public Recreational Center lapoktsüba mapang tangokba noksa (tilaba) nung angur. Maneni noksa (tuluba) nung Rio-i anir sorkar ketdangsürtemi iba tesem semdangba angur.

Dimapur, January 21 (TYO): January 21, 2021 nü Nagaland Chief Minister, Neiphiu Rio-i Green Park, State Horticulture Nursery, Dimapur nung Public Recreational Center semzüksüogo; iba sentong nung Rural Development Minister, Metsubo Jamir, Horticulture & Border Affairs Advisor, Mhathung Yanthan, NDPP Tir aser taoba mapang Minister/taoba MP, Chingwang Konyak, CP Dimapur, Rothihu Tetseo aser Horticulture department nungi ketdangsertem dena liasü.

Iba sentong nung jembidang Neiphiu Rio-i, Green Park ya Department atema dang masü saka nüburttem südoksünemtsü, asemzüksü, senden amentsü aser tanga nüngdak balala atema lapoktsüsüla, ta ashi.

Green Park ya yimti tiyongtsülen lir, anungji nisung aikati mapang indoktsü aser pei kibong züngsemtem aser medemertem den süngjema amongtsü atema iba tesemi arutsü, ta pai ashi.

Naga nunger ya tribals lir,

tesülen atsüngzüka liasü, sensaker liasü aser tesülen ang state jenjang anguba sülen tanübo terenlok aser shisaliok tajung lir, saka ano libaliro nung tangar memenep; anungji iba ama recreational centers ajanga nüburttem tangatetba melenshitsu, ta Rio-i ashi.

Paisa Chumukedima nunga park ka yanglutsü aser Kohima kübok Ministers Hill nung Zoo tejenba densema Nagaland University Campus Meriema aser Thizama Fishery Complex nung park yanglutsü telemteba agiba metetdaksü.

Item ama tepor tajung tesemtem ya public utility centers küma yanglutsüla, ta pai ashi.

Rio-isa Deputy Commissioner, administrative officers aser village council lenirtem dang peipei kiyong nung market atema, kiyimba sentong agitsü aser lokti amshitsu atema tesem wazüka ayutsü tebilemba lemsatapa liasü.

Iba dak sendakba nung pai Horticulture department dang DPDB sendentem nung iba onük benoka jembitsu aser item ama

centres yanglutsü atema district ketdangertemi telemteba agitsü ajungshi.

Paisa horticulture department dang Green Park nung cafeteria lapoktsü atema training junga agir temsüa alir lanur nem maongka agütsütsü asoshi advertise asitsü metetdaksü.

Nüburttemi mapang talangka nungi public park ka aginüa aliba ama department-i asangsang nung ataloktsüba atema parnok dang pelar, ta shia Rio-i pai-a mapang shia iba Center semdangtsü ta metetdaksü. Iba anogo nüngtem nung Chief Minister-i Magnolia naro süngdong ka temja liasü.

Kasa sentong nung Advisor Mhathung Yanthan aser Director & Mission Director (MIDH) Dr. R. Elithung Lotha natia jembi.

Iba sentong ya Commissioner & Secretary Horticulture Department, Anenla T Sato, IAS leniba nung agia lai lokti pelaa agizükba o jembi aser Horticulture officer aser Officer In-charge, SHN Dimapur, Alemtensu-i tepela anküp o jembia liasü.

Pei poksünga alitsü atema lenmang bushitsüla: T. R. Zeliang



NLA Opposition Leader, T.R. Zeliang aser ketdangsertem Jalukie Pungchi sayaba sülen tangokba noksa nung angur. (DIPR Peren, Jan. 21, 2020)

Dimapur, Aenjeti/January 21 (TYO): Jalukie Pungchi sayaba sentong ka January 21, 2021 nü Jalukie Pungchi Chairman kidang agia liasü, kong Leader of Opposition NLA, T.R. Zeliang ya

tongti tesemdang ama dena liasü. Iba yimtsüing ya 2012 küm October 22 nü kumtet aser Nagaland sorkari October 12, 2017 nung recognize süa liasü.

Jalukie nung aliba yimtsüingtem

rongnung alinük tsütsü yimtsüing tulutem rongnung Jalukie Pungchi ya ka lir aser kobi melie jila akumtsü temsüa lir, ta T. R. Zeliang-i ashi.

Paisa Jalukie Valley ya Nagaland nung ali temu tajungtiba

aliba tesem ka lir aser Rice Bowl of Nagaland ta züngshir, anungji nüburttemi pei peria züsentettsü alu aser süngjanglijang yoktsüla, koba agi rongsen timba ajangzüksü, ta ashi.

Iba yimtsüing ya Peren District tenemtsüing nung lir asünung model village ka kumdaktsütsü atema lenmang, kiletzü aoba tesem amala kanga junga yanglutsüla, ta yimtsüing ketdangsür dang ajungshi.

Sorkar mapa agi anünger, anungji asenok poksünga alitsü atema lenmang danga bushitsüla, ta pai ashi. Pai Jalukie Valley nung alirtem dang meranga inyaktü ajungshi, aji asünungbo Nagaland ya Punjab ama akumtsü aser state indang rongsenketsüing tamendak dak akumtsü, ta ashi.

T. R. Zeliang-isa ali kiburtem

dang khen anisüngzü angutsü atema ali meyoki tarutsü putu atema wazüka ayutsü ajungshia liasü.

Iba sentong ya magidang pai Peren District Welcome Gate nung nungshilong ka lapoktsü aser Rev. Ngimrai-i iba long meshiteta sarasademsü.

Iba sentong nung Albert N Hau aser Icamce N Hau na menden liasü aser Jalukie Pungchi Chairman, Hainlang-i tarur pela agizükba o jembi. Maneni ADC Jalukie, Dr. Tinojongshi Chang aser Kelie Zeliang natia o tatsütsü jembia liasü.

Iba sentong nungsa Nangkamlak Pame-i temeja ken ka aten aser Jalukie Students' Union ajanga sobaliba tsüngsang ka sayu aser Gorkha Baptist Church Fellowship-ia tsüngsang ya sayua liasü.

Cooperation Department-i "Cooperative Marketing Bus" saya



Kohima nung January 21, 2021 nü "Cooperative Marketing Bus" semzükba sentong ka agidang tangokba noksa nung Tiyongmeren Jamir, Registrar, Cooperative Societies, Nagaland aser dangartem angur.

Kohima, Aenjeti/January 21 (TYO): Yimtak yimtsüng nung alu nung züsentetba chiyongtsütem shishilempadak bener oa ayokba nung yaritsü atema Cooperation Department-i National Cooperative Development Corporation (NCDC) kübok Integrated Cooperative Development Project (ICDP) scheme ajanga Tuensang aser Longleng district atema "Cooperative Marketing Bus" ana sayaogo.

Registrar's Office Complex, Kohima nung iba bus sayaba sentong nung jembiba mapang, state nung rural economy ajungkettsü atema Cooperation department ajanga tajungtiba inyaktüsü meranger, ta Tiyongmeren Jamir, Registrar, Cooperative Societies Nagaland ajanga ashi.

Cooperative Marketing Bus yagi aluyimertem tenzüksü aser ajangzüksütsü, ta pai ashi.

Iba ama transportation facility asangdang kumdaktsüba atema pai G. Kaito Aye, Minister, Agriculture & Cooperation dang pelaba lemsatep.

Iba sentong teratet indang

Imsunungsang, Assistant Registrar, Cooperative Societies ajanga ashiba mapang, Integrated Cooperative Development Project (ICDP) ya National Cooperative Development Corporation (NCDC) kübok scheme ka lir, kong cooperatives development atema maparen balala inyaker, ta ashi.

NCDC ajanga Kohima, Tuensang, Longleng, Kiphire aser Peren district tem nung ICDP inyaktüsü atema 2018 küm January ita sen lakh 5209.98 sanction süa liasü. Iba project ya kum pezü atema lir.

Küm ishika tejekdang department ajanga "One Village one Society" register asütsü tenzük, kong yimtaklir rongsenketsüng jenjang ajungkettsütsü nükjidong nung kibong shia nungi züngsem kaka tenüng zülüoka liasü, ta pai ashi.

ICDP project yanglyba mapang yimtaklir temi parnoki züsentetba chiyongtsütem tajangzük lia meyokteter aser transportation shidak maliba ajanga shishilempadak nungia tongtipang osettem bener arutsü tasak akumer, ta department-i ajiteta liasü.

Yimtsüng nung item aluyimer timtem ajuruba ajiteta department-i passenger shilem 60 aser oset shilem 40 abentsü atema Cooperative Marketing Bus (CMB) ya yanglu.

Iba bus ya ajanga alu nung züsentetba oset ajunga belentsü akok. Maneni kiset shiruru tema teyari kaka belentetsü.

Iba bus nungya passenger 17 amentsü menden lir, saka oset tajemba lira passenger 23 tashi amentsü akok, ta Imsunungsang-i ashi.

Iba gari ya "Market on Wheel" ama amshitetsü.

Gari ya Kamrup Construction, Guwahati nung TATA LP / 410 chassis amshia sen lakh 23 shi indoka yanglu.

Iba sentong nung Bokato Hesso, Deputy RCS menden liasü.

Pang Village Integrated MPCs Ltd, Tuensang aser Tamlu Village Integrated MPCs Ltd, Longleng nungia nisung anati iba sentong nung jembiba aser yimtak yimtsüng economy ajungkettsütsü atema mapa tajung inyakba atema parnoki sorkar dang pelaba lemsaa liasü.

AAPSU-i China anema longkak ait

Itanagar, Aenjeti/January 21 (Agencies): Arunachal state kübok Upper Subansiri district nung China-i yimtsüng ka amenokba anema All Arunachal Pradesh Students' Union (AAPSU)-i Brehostibarnü longkak aiba sentong ka ayongzuka agiogo.

AAPSU-i Centre dang jenjang tapet agitsü aser iba ken o bentetsü khangogo.

China-i India litsü nung Arunachal kübok yimtsüng ka amenokba osang Hombarnü prokshiba sülen iba longkakaitba sentong ayongzuka agi.

"China-i ozü state par meyong ta ashiba ajanga visa dak sendakba nung ken o adokogo

aser iba den union-i iba ken o aiben benokaka Siang ayong dak sendakba nung tebilemtsü tanü tashi mebenteti lir," ta AAPSU tekolakba Hawa Bagang-i ashi.

Bagang-isa, Arunachal Pradesh ya India nung shilem ka lir aser state nung aliba nüburtem ya India nungertem lir, ta ashi.

"Linük atema nokdaktsü ayongra lanurtem nokdaka linük kümzüka ayutsü renema lir," ta pai ashi.

Kasa mapang nung Arunachal Pradesh kübok Upper Subansiri District nung alirtemia Brehostibarnü longkak aitba sentong ka ayongzuka agiogo.

Placards amer parnoki China

anema yimyim balala ayima longkak aitba den China tir Xi Jinping indang noksa rongtokja lir.

Longkak aitertemisa 'Bharat Mata Ki Jai', 'We Are Indians', aser 'China Go Back' ta yimyim ayima liasü.

Kasa mapang nung Pasighat nungi Congress MLA Ninong Ering-i, Ato Kilonser Narendra Modi nem Anini sector kübok Demben nung China nungeri lenmang yangluba indang osang agütsüogo.

"Centre-i iba ken o reprangshim mesüra tarutsü nung Arunachal Pradesh aser linüki tia tamajung ajangshitsü," ta Ering-i ashi.

OFFICE OF THE DIMAPUR AKHOYA FELLOWSHIP DIMAPUR, NAGALAND. SANGDONGER :

January 23, 2021 anepdang 7:00 Am nungi sarasadem sentong ka agitsü renema lir, anungji senso aser anükapang ajak iba sentong nung arua temoatsü agitsü ayongzük.

Tesentepdak : Yimchungru Baptist Church, Half Nagarjan, Dimapur.

Classical Swine Fever atema ak nem mozü agütsütsüla

Dimapur, Aenjeti/January 21 (TYO): Directorate of Animal Husbandry & Veterinary Services ajanga state nung ak metsürtem dang parnok indang ak (talisa breeding stock) nem meyi marudang anasatiba Veterinary Institutes nungi Classical Swine Fever atema mozü meshia agütsütsü metetdaksüogo, kechiaser iba tashidak ya Nagaland nung lir.

Maneni Chief Veterinary Officers ajunga dang vaccination cost, Classical Swine Fever vaccine (1st Phase) procured under CSF-CP - 2019-20 (CSS 90%) aser

Classical Swine Fever vaccine (2nd Phase) procured under State Plan-2019-20 tem Directorate Office nungi mapa inyakba mapang meshitsü metetdaksüogo.

Vaccination cost ya gari taa agütsür amshiba, vaccination tools, kumba, antiseptic, contingencies, mapa inyakdang chiyongba amala nung amshitsü akok.

UC aser senotsü indokba sangdong ya record atema Directorate Office nem agütsütsü aser mozü ya district shia tahidak yimya asadanger "ring or cluster" nung agütsütsü akok, ta sangdong ajanga ashi.

District Legal Services Authority temi sentong balala ayongzük



Dimapur, Aenjeti/January 21 (TYO): Kohima District Legal Services Authority puri January 15, 2021 nü Good Samaritan Society indang seminar nung dena Senior Citizens Helpline, Nagaland pur tang training tagidak aliri molungba ama 'Senior Citizens Maintenance Act' indang awareness agüja liasü.

Sunjib Rana, Retainer Lawyer, Kohima DLSA ya shisalen sayur ka ama iba sentong nung Maintenance and Welfare of Parents and Senior Citizen Act onük nung ajemdaker jembiba, koba 2007 küm benoka liasü.

Pei tsürabur ka ama teinten rogorem anepalutsü indang pai rasaa ashi aser iba Act yagi tanur mesüra kinunger, semchirtem shirnoki teintet rogorem indang senmang amangtsü ali, parnoki tsürabur aser teintet rogorem anepalutsü indang shia lir, aser yangji pei sasa aazükba agi meperirtemi parnok tanur mesüra semchir dang maintenance atema apply asütsü akok, ta ashi.

Ita shia maintenance atema sen 10,000 tashi agütsütsü akok, ta pai ashi.

Vimeno Nakhro Panel Lawyer-i National Legal Services Authority (NALSA) aser sorkari scheme balala yanglua aliba indang jembiba liasü. Teintet rogorem atema NALSA scheme ya 2016 küm tenzük aser yangji arishi küm 60 nungi tema ya teintet rogo ta züngshir. NALSA scheme indang nükjidong tongtipangtibaji asen state sorkari temzüng aser Governmental Scheme tem nung teintet rogorem atema temeden aser teyari agitsü indang awareness agütsütsü ya lir aser teintet rogorem atema scheme 13 shi lir,

ta pai ashi.

Iba sentong ya NIELIT, Meriema, Kohima nung agia liasü.

Mokokchung District Legal Services Authority ajanga Mokokchung nung police station ana den women cell semdanga pua alirtem temeden, apusü lia, pur aser tepuokdak lia tekeratiba nung okatsür agütsütsüba aser DLSA temi officer-in-charge den kulemi services balala agütsüba indang sensaksema liasü.

Wokha District Legal Services Authority ajanga tanur aser lanurtem nem 'Juvenile Justice Act', Prohibition of Child Labour aser danga Legal Rights indang January 18, 2021 nü angatetdaksü.

Iba awareness sentong nung Para Legal Volunteers Mhajamo Khuvung, Lichumo Kikon, Ajano Ngullie aser Advocate Shanchobeni P Lotha, District Project Assistant, Wokha DLSA nungertemi shilem agia liasü.

Wokha DLSA ajangasa Indianeers Skill Academy Wokha den lungjemer Longsa Legal Aid Clinic, Wokha nung Health aser Social Welfare Scheme balala indang awareness sentong ayongzuka agia liasü.

Iba sentong nung Para Legal Volunteer, Ajano Ngullie-i Legal Rights balala, Health aser Social Welfare Scheme indang onük nung jembiba, Lichumo Kikon, PLV & Trainer ISA ajanga Skill Development Programme balala indang rateta ashi. Angati Skill Development training agitsü atema yangji tenüng zülüoka liasü. Iba mapang PMKVY Scheme kübok nisung ti tenüng zülüoka liasü.



Ungma nung Wb. M. Meren Longkumer-i Ao oshi nung züluba 'Alar Taküm Otsü' Ungma Baptist Arogo, Assoc. Pastor (W), Wt. Talijungla-i sayatsüba mapang tangokba noksa nung angur. Iba kaket zülur o pa temeim kinüngtsü Wt. Lentongsungla Jamir tena kibong kümer küm 54 ajungba anogo iba kaket sayaa liasü. Tsürabur M. Meren longkumeri tang tashi nung kaket 13 zülüogo. Ungma, January 21, 2021



January 21, 2021: Manipur state 49buba Statehood Day Imphal nung Brehostibarnü takok nung mungogo. State sorkari iba anogo 1st Battalion Manipur Rifles Parade Ground nung sentong balala ayongzüka agiogo.

KHADC-i ASTC transit camp amenokba anemer

Shillong, Aenjeti/January 21 (Agencies): Meghalaya nung Khasi Hills Autonomous District Council (KHADC)-i, Assam State Transport Corporation (ASTC) transit camp ka amenokba anemogo. KHADC-i ashiba agi, ASTC indang transit camp yanglutsü atema tesem asateper aliba ya Meghalaya kübok Khanapara tesem nung lir.

Iba inyakyim ya ozüing alema ta shia, KHADC CEM Titostarwell Chyne-i, Assam srokari tangsa tang inyakyimtem anentsü nüngdaker, ta ashi.

KHADC-i iba ken o dak

sendakba nung Assam nung Kamrup-Metro district Deputy Commissioner dangi shiti ka züluogo.

"Onoki Kamrup district Deputy Commissioner dang jenjang tapet agia inyakyim tem anendaktsütsü atema shiti ka züluogo, kechiyong iba ali ya Meghalaya meyong lir," ta CEM Titostarwell Chyne-i ashi.

Chyne-isa, KHADC-i Meghalaya Chief Secretary aser Deputy Commissioner Ri-Bhoi district dang iba ken o dak sendakba nung jenjang tapet agitsü mepeshia shiti züluogo, ta ashi.

"Transit camp yanglua aliba ali kiburtemi ken o bentetstütsü atema KHADC teyari meshia liasü," ta pai ashi.

Meghalaya aser Assam na küm aika arrtsü dak sendakba nung mangatettep adoka arudar. Arrtsü nung tesem 12 nung mangatettep adoka lir aser state anapronglai item tesemtem parnok meyong ta ashir.

Meghalaya sorkari Assam den arrtsü dak sendakba nung mangatettep aliba ken o Union Home Minister Amit Shah-i January 23 nü state semdangba mapang lemsateptsü akok.

RRAG-i CM indang constituency nung inyakyim ashishi

Aizawl, Aenjeti/January 21 (Agencies): Mizoram nung rights group; Rights and Risks Analysis Group (RRAG)-i Chief Minister Zoramthanga indang constituency, Aizawl East nung high school ana, higher secondary school ka, primary school ka aser mini football stadium ka yanglutsü atema benoka aliba ashishiogo.

RRAG-i, Minister of Minority Affairs, Mukhtar Abbas Naqvi dang item mapatem atema senotsü magütsütsü mepeshia shiti ka züluogo.

Rights group-i ashiba agi, Mizoram dak sendakba nung item project tem ya lokti nung nütsüing agi ajema aliba teloktem aliba tesem küboki maiter.

"Mizoram nung Khristan tem ya majority ta züngshir aser Buddhists o Khristan masürtem ya minorities ama züngshir," ta RRAG-i shiti nung shia lir.

"Item inyakyim dak ajemdaker Pradhan Mantri Jan Vikas Karyakram (PMJVK) atema Ministry of Minority Affairs-i tetuyuba agütsüba kübok Mizoram nung Mamit (West Phaileng aser Lawngtlai (West Bunglemun, Lungsun, Chawngte, Lawngtlai aser

Bungtlang South) nung towns/blocks kar nung dang iba project benoka inyaktetstü kong lokti nung nütsüing agi ajema aliba teloktem longsoa lir," ta RRAG-i shisem.

"Anungji PMJVK guidelines kübok CM Zoramthanga-i 2018 küm nungi Aizawl East-I constituency nung project tem benoktsü atema inyaksangshiba ya Ministry of Minority Affairs-ia lokti nung nütsüing agi ajema aliba tesem ama züngoksemtstü temsüa mali ta jangjaogo," ta RRAG Director Suhas Chakma-i ashi.

RRAG-isa, Minority Affairs Minister Mukhtar Abbas Naqvi dang, Mizoram sorkar dang Mizoram nung Chakma Autonomous District Council (CADC) sorkar den sensaksemer Lawngtlai district kübok CADC Headquarters Chawngte, kong Buddhist nung timba lir iba tesem nung item project tem inyaktstü atema tanaben benokshitsü asoshi ajungshitsü mepeshia asüngdangogo.

Temetststü kaji Mizoram Chief Minister Zoramthanga-i, January 12 nü Union Minority Affairs Minister dang Pradhan Mantri Jan Vikas Karyakram (PMJVK) kübok sen crore 35 alang item project tem inyaktstü atema senotsü teyari meshiogo.



January 21, 2021 : Chief Minister of Assam, Sarbananda Sonowal-i Guwahati nung Akshaya Patra Foundation indang centralised kitchen tsenba lapoktsüogo. Airports Authority of India (AAI)-i senotsü teyari agütsüba kitchen ajanga Akshaya Patra-i, state nung Mid-Day Meal (MDM) Scheme benoka inyaktstü. Iba kitchen ya 40,000 sq. ft. ali ka nung yanglua lir aser iba kitchen nung ghonda asem tsüingda nisung 50,000 atema chiyongtsü renemtsütetstü. Akshaya Patra-i, iba tesem nung aliba sorkar school 600 nung kaketshir 40,000 atema mezüing chiyongtsü renemtsütsü aser iba sülen tanur timba atema chiyongtsü renemtsütsü.

Tripura nung BSF sepaitem nem Covid-19 vaccine agütsü

Agartala, Aenjeti/January 21 (Agencies): Tripura nung Brehostibarnü nungi Border Security Force (BSF) sepaitem nem Covid-19 vaccine agütsü tenzüko.

Inspector General of BSF Tripura frontier, Susanta Nath-i ashiba agi, BSF kübok health workers noklang aika nem vaccine agütsütsü.

"Item health workers tem yagi linük nung wara poktetba sülen nüburtem atema bendanga agüja inyaka arudar," ta Sushanta Nath-i ashi.

Tripura nung tang tashi nung BSF sepai 1532 dak Covid-19 tashidak potetogo aser parnok rongnung kabo tashidak agi süogo.

"BSF Composite Hospital nung health workers ajak

Covid-19 vaccine agütsü renema lir," ta BSF doctor BJ Lalwani-i Brehostibarnü vaccine agiba sülen ashi.

BSF sepaitem rongnung timba Dhalai district nung alirtem dak coronavirus tashidak poteta lir.

Ato Kilonser Narendra Modi-i alima nung Covid-19 vaccination campaign tulutiba India nung January 16 nü tenzütsü.

India sorkari linük nung health aser yakbang nung inyaker crore 3 nem mezüingbuba shilem nung vaccine agütsütsü sentong lir.

Tripura health department-i vaccine agütsüba sentong tenzüker anogo asem tsüingda health worker shilem 54 nem vaccine agütsüogo.



**DISTRICT ADMINISTRATION &
DISTRICT LEVEL CENTRE FOR WOMEN-
MAHILA SHAKTI KENDRA, MOKOKCHUNG.**



**CELEBRATES
BETI BACHAO BETI PADHAO WEEK
21st-26th January 2021**



**Kaket riju nung tetsür tanur tenüing
züluoktsü, kaket shisatsü bushitsü aser
nükjidong shimba nung tetsürtem
ajungketdi.**



TIR YIMYIM YIMOBILEM (EDITORIAL)

DIMAPUR ROGONÜ, AENJETI(JANUARY) 22, 2021

LAISHIBANUNG METALOKBA

Küm pezü shia alima nung democratic yimten tejentiba, tajungtiba aser tashi taittiba lima United States of America nung tir shimer aser tir inyaksü shimtetsangji, yimten mapa tenzüka maodang Laishiba nung teka abeleni nemettsü aser teka achiji mekanger, ni kü tajungtiba agi linük temzüng kümzüka ayutsü merangtsü ta tenangzükba agiba asenoki aiben angur. 1789 küm mezüng US tir George Washington tir inyaksü asoshi tenangzükba agidang, pai Laishiba ka bener arua yangji nemeter agi aser iba sülen pai Lashiba nungji tebang mesep. Ibaji alima nung yimten tasen ka, American yimten alangtetterba liasü. Iba mapang nung jagi tenzüker US tir inyaksü asoshi tenangzükba agidang Laishiba ka bener arua yangji nemeter tenangzükba agitsübaji sobaliba amato ka kumadok. Atangji, US tir inyaksü tenangzükba agidang, Laishiba nung nemeter dang agitsüla ta ozüngsabo renema mali, anungji tir karibo tenangzükba agidang Laishiba mamshir saka tang tashi nung US tir inyaka arurtem teimbakati Lashiba nung nemeter tenangzükba agia aruogo. Aji oda, US tir inyaksü atema tenangzükba agiba mapang tanga oren kecha mali, saka US temzüng wazüka aser kümzüka ayutsü ta tenangzükba agir. Tetezü, linük temzüng ozüng alema meinyaksü ta nangzüker, anungji asenoki bilemtsü agibo, US tir inyaksü tenangzükba agidangji Laishiba nung masü saka US temzüng kaket bener arua yangji nemeter nangzüksüla. Iba kasa tangatetba aliba jagi, US tir inyakerter rongnung John Quincy Adams-ibo Laishiba nung masü saka US temzüng kaket nung nemeter tenangzükba agiba otsü lir. Ano, US tir Dwight D. Eisenhower-ibo Lashiba nung nemeter tenangzükba agiba dang masü saka sarasadem dena agia tenangzükba agia liasü. Aji oda, tang US tir tasenba Joe Biden aser pa jakdang asenoki meteta yimsü asür US tirtem rongnunga Donald Trump, Barack Obama aser George H.W.Bush nungertem ajak Lashiba nung nemeter tenangzükba agiba asenoki nguogo. Mezüng tir George Washington tir inyaksü tenangzükba agidang amshiba Laishibabo tangar tekülemdak ki ka nungi bener arua amshiba liasü saka tang Joe Biden tenangzükba agidang amshiba Laishiba yabo par tsüraburtemi kidang amshiba küm 127 tejen Laishiba ka süngden tajung tilaka nung enoker bener arua, pa kinungtsüi ajunga atadang, pai pa teben abenlen agi yangji nemeter teka achiji mekanger, America nung asoshi linük temzüng ozüng shitak amshia inyaksü tenangzükba agiogo. Alima kintem rongnung Tsüngrem dak dang amanga kumtetba limaji America ya lir. Iba jagiang parnoki parnok sen nunga dena "Tsüngrem dak onoki temulung alemer" ta zülur. Atangji, tanübo US nung tanüla aser tamang jenjangji reprangdangra, akhidang Sodom Gomora lima ama kümer asenoki angur, kechiyong iba lima nung atsüapong dena kecha mebendang tetsür o tetsür na aser tebur o tebur na Tsüngrem tenüng nung kibong kümtsür. Iba dangji temaba aser tamajungba alima nung nisungtemi inyaksüsa azüapong mapa kechi ali ? Ajisüaka, tanü tashi Tsüngremi America lima meimba asenoki angur. Ibaji, ashiko, America nung aikati Tsüngremi maginütsüsa inyakaka, tang tashi America nung Tsüngrem pelatsüsa inyaker teindang nisung pongobo mesüra terbo alitsüa akok. Ashiko, Tsüngremi akhidang George Washington-i Laishiba nung nemeta tenangzükba agir Lashiba dak tebang meseper America yimten lateta aoba anogo mamar asütsüa akok. Tanüa alima ajak madak America-sa tamarenba aser tashi taitba lir. Greek yimli, Rome yimli aser England tamaren yimli ajak süiogo saka America yimlibo tashi taitba – taitba akümba asenoki angur. Tanübo America lima aser America nungertem ya America asoshi dang masü saka, talisa, timtema aser tetsübu nung kangshiseta aser ajemrepa aliba alima kintem aser nübortem asoshi tekümüker aser teyari agütsür lima aser sepaitem kümogo. America nung sepaitemji alima sepaitem lir. Parnok dak tashimaitertem aika jenoker. Ibaji tanga tashi agi masü saka Tsüngrem dak amangba tashi ajanga lir. Tsüngrem dak amangbaji tanga amangtsüba masü saka Tsüngremji dang anüng aser ali madak kibur aser Pa alema tanga tsüngrem aser kiburtem asenok madak shinga mali. Tsüngremi dang taküm, shisatsü aser rongsen ajak agütsür aser Pai dang anüng aser ali madak yimsü asür ta George Washington nungi tenzüka tanü Joe Biden tashii amanger. Iba tamang jagi America-i Laishiba mechioker aser iba tashi jagi America merener.

OLEMSABANG

KAKETSHIR MONGPU ARUOGO VII

~ Talitemjen Imchen

Onok mapang tashi nung kaket palala alitsü sen kanga nüngdaka liasü. Kaket zügnüa liaka, kaket ajakbo sen agi alitsü meperi. Kaketshir timbaka tsürapur nungi sen tekapu masüng dang angu. Tain rogotemia temeim taochi sayua, senoset tsüktepa lanurtem dang awashitepa yariteptsü lenmang kanga temesü mapang. Iba jagi medemer o medemer na yongtsü nung kaket meshitepa azüng.

Tanübo onok mapang den medemdangra, alimaji bentetbenteter. Ano külenbo, kaketshirtem-i Indian Prime Minister Modi dang kanga pelatsüla. Internet talitsü jenjang ajema India ajunga nung Internet agütsütetba ajanga, pei pei zügnüba kaket aser syllabus ajak angur. Iba jagi India ajunga nung dang masü, saka alima ajunga den kaketshir ka standard kasa dang akümer.

Onok mapang aier asangur tepur tajungtem aikatiibo kaketriju nung kanga takok ngua mazüng. Aikati kaketriju nung masü love letter nung temolung agütsü. Nibo taküm nung aier nungi love letter angubabo mebilemteter, saka lesson ji ni kangabo makok. Ano television alir chirnurtembo, kasa medemer aser medemtsür dang süaka, chupar jala aser chupar jabaso ama mera keta reprang. Tanüa na Internet amshibaji, nai tajunglen amshir asü takoksalen amshir kanga tongtipang. Na anepdang shia nükküp waker sakbaji, games asayaba mesüra tamagilen ka nung dang mapang indoker lira, ne tepenjem mapang amajok nung indoker asütsü. Saka ne nükjitong tajung nung mapangji amshir lira, na asoshi koda tajangzük aser alima asoshi koda temoatsü.

Onok mapang nungbo government school nung azünger aser private school nung azünger jenjang palala nung amshi. Tsüraburtem-i kasa kipong nungi süaka, parnok alu nungi adokdang, government school nung azünger lenchii arudaktsü. Saka private school nung azüngerbo school senshir tuition yokba otsütem-a liasü. Tanübo iba mapangjia süia ogo. Kaketshir aika asoshi, kaketriju aser tesayur palala nungi angazükba dang, Internet nung angazükba tuluba kümogo.

Onok mapang nungbo yimtsüng nungi pilar town nung azüngertem ji jenjang palaka nung meraküta reprang. Ano Nagaland ajanga or azüngertem jibo, parnok soti arua ajuruteptsü winter vacation kangasa yongya. Tanübo kaketshir ka asoshi Internet aliba ajanga kasadang kümogo. Na kodaka talangi oa azüng ta masü, mesüra sen koika indoka azüng ta masü saka nai ne shilem (course) ji koma azüng aser meteta lir ta dang asadanger.

Onok mapang tsürapurtem-i sayasako (advice) ajakji tongtipang ta dang ashiba mapang liasü. Tanübo ajia menügdaki kümogo. Ramen-i shirang dang mozü ajak tongtipang masü saka ramen mozü tongtipang mesüka, ne shilem (course) ka mesüra aser ne nükjitong indang mesüra kechi atema menügdakba tajungshi o anga kazüktsü. Mapangji senti kümogo. Nai sayasakor (advisor) tajung kar yura, iba jagi teperi. Mesüra asen kechi nüngdaker iba nung dang sayasakor ji nüngdaker. Joko teloktesen ajak nunga adentsü menügdaker. Teloktesen nung takok ngua dener, pei azüngba riju nung tamakok ngura aji takoksa tuluba.

Sen masü joko mapangji senti kümogo. Onok mapang nepu ayoktsü nepu jenti liasü. Saka sen agi kanga anüngakongba mapang. Ayanger nepu tajung jenti yutsür, tsürabur-i tera nemnema nepubo majunga, saka angati sen magütsüteter taji adianu asaa senyong (taa) mapa inyakdaktsüba liasü. Tanübo sen jenti lir, kechi mapa inyaktir sen angur, saka mapang maliba putu ka nung asenok ajak lisema lir.

Tamangertem pei pei sasa dang amanger tatem anogo nung Yisu-i obendangtsü mesüka, kaketshirtem pei pei sasa dang zünger online exam agütsübaji, kenü rungpan tatidang (competitive exam) nung medemsortem den külemi ajurutepdang, mesasatsüsa meranga züngangma. Kaketshirtem pei pei nükjitong nung rangloker azüngba ajanga, Tsüngrem-i takok tajung moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Income Tax Dept-i Tamil Nadu nung Jesus Calls Ministry mita ao



Jesus Calls Ministry indang Prayer Tower ka noksa nung angur.

January 21, 2021: India nung Federal income tax ketdangsertemi India kübok Tamil Nadu nung Jesus Calls Ministry aser nüngtugu sayutsüngir ka indang office tem mita ao; tesüiba ita asem tsüngda tax department-i tang agi tanabenbuba Khristan kiojentem mita aoer.

January 20, 2021 nü Income Tax Department-i Tamil Nadu nung sayutsüngir, Paul Dhinakaran indang kiojen 29 shi mita ao; Paul Dhinakaran ya Jesus Calls ministry tentetsang aser sayutsüngir, asür D.G.S. Dhinakaran'e jabaso lir.

Tax ketdangsertemi Chennai yimti nung Jesus Calls Ministry kiojen aser Coimbatore jila nung Karunya Institute of Technology & Sciences mita ao.

Yaküm November ita nunga tax ketdangsertemi Kerala nung anogo asemnü tashi Believers Church indang headquarters-a mita repranga liasü.

Believers Church lenirtemi ashiba agi, parnoki sorkar nem saru shidak agütsüba kuli ketdangsertem nem agütsüogo. November ita nung Believers Church mita aoba sülen ketdangsertemi shinga mapu mesüra ochimashi kecha meputeti liasü.

New Delhi nungi nisung kari ashiba agibo, Tamil Nadu nung assembly election agitsü aliba nung ajemdaker Arogotem mita ao asütsüa akok.

Dhinakaran indang Jesus Calls Ministry ya Tamil Nadu nungtang masü saka south tsütsü aliba state tem nung kanga nüngtugu lir, anungji iba ministry-i voters aika mesüzüktettsü akok, ta bilema iba ministry anema inyak asütsüa akok.

Ano iba ya Bharatiya Janata Party (BJP) asalentong ka asütsüa akok, ta observer kati ashi.

Jesus Calls ministry-i ita shia oshi 10 nung alima tesem ajaklen program 400 shi telecast asür, aser item programs nung sarasademba aser tamang agi timtem koktettertemi parnok taküm nung sayatenya atalokbatem kuli lemsateper.

Jesus Calls Ministry website nung yamai shia lir, "Anogo shia nisung meyirjang aikati temoatsü aginer, pei taküm nung sayatenya atalokdaksüner, anungji pei nüngdak Tsüngrem dang ashitsü aser sayatenya ataloktsü atema parnok asoshi Jesus Calls Prayer Towers lapokja lir."

"India nung Prayer Towers 109 lir aser India adener

bendanglen Prayer Towers 14 lir, aser item towers nung timtem ajanghia alirtemi sarasademer," ta website nung shia lir.

Karunya Institute of Technology ya 1986 küm amenoka liasü, iba Institute nung kaketshir 8,000 dak temai science & technology, arts, media aser management indang course balala agir.

Hindu teloktem aser BJP-i, linük nung Khristan telok balalai bendanglen nungi aruba senotsü amshia shisaliok aser health services agütsür, aser item teyari balala agirtem dang Khristan yimsü agizükang ta ashir, ta aitsür.

Khristan teloktem anema inyakba ajanga BJP-i Hindu yimsü atema inyaker, ta bilema state kar nungbo BJP-i yimtenren tsütsü tajangzük kanga angur, ta Observer temi metetdaksü.

Sayutsüngir Paul Dhinakaran-i linük yimtiba Delhi nung yimtenren lenirtem den-a tesendaktep junga ayutsü meranga tongtepratepa alir. 2013 küm BJP-i Ato kilonser candidate atema Narendra Modi shima sangdongba sülen-a Dhinakaran-i tsüngdong oa Modi ajurua pa nem tenüngsang agüja liasü.

CBCC-i Coronavirus vaccine indang shin oji mamangtsü mepishi

New Delhi, Aenjeti/January 21 (Agencies): Nagaland nung Baptist Arogo kati amangbapurtem dang healing ministry kati Covid-19 vaccine ji Tsüngremi memelungba, ta shinba oji mamangtsüla, ta metetdaksü.

Khristan nütsüng timba aliba state nung Chakhesang Baptist Church Council (CBCC)-i nüburtem dang item ama shin oji mamangtsüla, ta metetdaksü.

CBCC-i sangdong ka ajanga, Eastern Zion Healing Ministry-i Covid-19 vaccine agitsüji Tsüngremi melungba masü ta shina liasü, ta metetdaksü.

"Item ama tiyazü shin oji Laishiba aser Khristan tamang den meputep, anungji amangbapurtemi item ama shin

o mashie mamangtsüla," ta sangdong nung shia lir.

Kohima nung Catholic Bishop, James Thoppil-ia, Nagaland nung telok telemsa aika lir aser Khristan Arogotemi itemji mazuökteter, ta ashi.

"Item ama telok aika kuli balala ajanga tongti Argotem nungi pilar lir. O mashie jembitsü atema parnok sadema ilir, aser itemji togngti Arogo den sendaktepa mali," ta pai ashi.

"Yangi healing aser prayer ministries aika lir aser parnoki parnok tongti Arogo ta jembir. Khenkhenbo parnoki Catholic Arogo nung adenertemji taila Khristantem ta ashir, ajisüaka onoki parnoki jembibaji mangashi ama toktsür, kechiyong ibaji tetezü maket," ta pai ashi.

CBCC-i, "Covid-19 vaccine ya ajak atema yanglu. Asenoki iba ya yimsü dak sendakba onük ka mekümdaktsüli. CBCC ya Nagaland Baptist Church Council kübok tentet ka lir, aser iba onük nung onoki NBCC pusemer," ta ashi.

NBCC ya Nagaland nung Baptist Arogo 1,500 jungnüa adenba tentet ka lir. State nung nütsüng million 2 nungi Khristan nütsüng shilem 90 lir aser Khristantem timbaka Baptist lir.

Tawa Eastern Zion Healing Ministry-i, "Tawa tenzükba Covid-19 vaccination ya Tsüngremi melungba masü, anungji amangbapurtemi iba vaccine magitsüla. Iba vaccine agirtemi Khristar yimli nung medentettsü," ta metetdakja liasü.

ANOGO ABEN TSÜNGREM DEN

Ibai kü meimchir pa dang angang! Mathi 17:5

Peter aser tangar nütsüngtem teti Tsüngremi mulungba mangatetti liasü. Yisui balaka bilem, nütsüngtemi balaka nung temulung agütsü ama lir. Pa anasa aliba nütsüng asem tajungba yaritettsü asoshi Pai pa kangki nung bendanga agütsüba nung rangloker Yisui parnok asem sentsü melenba Tenemi anir atu. Idakji Yisu sentsü melen aser Mosa aser Elijah, otsü nung tashi taitiba Tsüngrem nisung ana aten. Aji saka nütsüngtem anünüa liasü! Otsü nung Yisu den sarasademba alitsü melen mejanga alitsüang jangraa liasü.

Kodang nütsüngtem saka tanabena parnok tangalen atsüzük. Iba mapang Peteri pa sendong semtu asem yanglutsü ashi. Nütsüngtemi Tsüngremi Yisu Khrista ajanga tekümtet mapa dang nungi parnok Tsüngrem asoshi inyaktsü bilemba nung tali temulung agütsü. Tatem nung Tsüngremi parnok nukla ajak indoktsü aser Yisu dang ngudaktsü. "Ibai Kü meimiba chir, shiba dak ni temulung achir. Pa dang angang."

Tanela nung melamela atsüa aotsü temela. Nai ajak toktsü Yisu aser temeket nung Pai inyakba nung rangloker asü? Tsüngrem mulungjang nung kechi lir aji nai jangja mangashi mapa nung atentsü nai janrar asü? Na kechi agi atsür odaktsür aji indokdaksütsü Tebu nüngdaker asü? Nai Yisu dak rangloker asü ?

Asenok tamakok ochishia nangzüktsüba dang nungi tangar tanela nung takok ngua aliba shi nemtsütsü temelaba. Yisui "parnok tesongtem" ta ashi. Pa nütsüngtem süngmanger alitsü (Mk. 9:39). Pai parnok dang ashi "Shiba asenok anema masü pa asenok tsütsü lir." Nai taküm aliba lesson angazüker asü? Nai tangar tanela nung takok anguba nung pelar asü? Shirnoki Kibuba tanga lemanng ka nung tenzüker mesüra tanga telok ka nung atener parnok ajungshir asü ?


Nigeria nung puer aoba putir John Gbakaan tasü mang nguogo

January 21, 2021: Nigeria bangjema liasü. kübok Benue State nung Ajisüaka parnok Gbakaan prangpong amer telok kati tepsetba sülen pa apuba tesemi Khristan putir, John Gbakaan tasü mangji bener oa toktsü.

puer aoba sülen anogo ka dang Tang tashi Gbakaan'er lir Honibarnü (January 16) pa adianu aser putir ka na dak tasü mang anüka rangsatsür kechi atalokar metetet. Tena süngdong ka nung alener tang tashi parnok ket nung nguogo. alitsüa akok, sen magütsü tashi maneni pua ayutsüa akok

Hokolbarnü (January 15) putir, Gbakaan, par adianu ka mesüra tepsettsüa akok. aser ano putir ka densema par Küm shia Nigeria nung putir asem Benue State nungi pei aika puer aoer, kar chioker aser talidak- Niger State-i meyipa karbo tepsetter. aoba mapang nung mejangjaba Yaküm January ita nunga nisungtemi parnok puer oa Boko Haram teloki Rev. Lawan liasü. Andimi puer aoba sülen tepset; pai Yisu Khrista toktsütsü tatsüka tsüngda mejangjaba memelungba agi tepseta liasü. nisungtem jagi Gbakaan'er Yaküm February ita nunga Arogo dang pa den tangar ana telok kati seminarian, Michael chioktsü atema parnok nem US Nnadi puer aoba sülen tepset. sen 80,000 agüjang ta takhangba October ita nunga ISWAP teloki agüja liasü. Rev. Polycarp Zongo puer oa Arogo aser parnok liasü aser tang tashi pa parnok tsüngda jembiba sülen US sen ket nung lir ta bilemer. 13,000 dang agütsütsü

OLONG PAITEP # 5701



TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 5700 TELANGZÜBA

TIPIEN :

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok, 5. Orak,
8. Ainer, 9. Anema, 10. Jabili,
11. Among, 12. Miim, 13. Anem.

CLASS ROOM NUNG LESSON MAGINERBA
MISSLA DANG CHAMJA MARIR :

- Polokba** : Aya Miss, tanepsa tobour a tajungba angura nii.
- Missla** : Hehehe, yamaji na?
- Sobangba** : Shitakanii, film nung starring la mesüka angura.
- Missla** : Kwa ni jagi koba film nung starringla mesük aka?
- Alokba** : Tetsübotsü film(horror film) nung heroen la to kürak angur ati.
- Missla** : Shuuut-up, maths book lapokang nonesense!!

Lilir : WhatsApp

TANÜBO NAI LANGZÜANG

Q. Koba Ministry kübok Central Adoption Resources Authority aiter?

- A.Ministry of Health
- B.Ministry of Women and Child Development
- C.Ministry of Education
- D.Ministry of Railways

===== (Taruba adok nung onoki langzütsü)

YASHI ADOK TELANGZÜBA : Kerala



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela
Tasoba Anogo

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

ALIMA NUNG JENJANG TULU AKETBA CAR BRAND TEM:

BRAND		(BRAND VALUE)
1. TOYOTA		\$51.59 BILLION
2. MERCEDES-BENZ		\$49.26 BILLION
3. BMW		\$39.75 BILLION
4. HONDA		\$21.69 BILLION
5. HYUNDAI		\$14.29 BILLION
6. TESLA		\$12.78 BILLION
7. FORD		\$12.56 BILLION
8. AUDI		\$12.42 BILLION
9. VOLKSWAGEN		\$12.26 BILLION
10. PORSCHE		\$11.30 BILLION
11. NISSAN		\$10.55 BILLION
12. FERRARI		\$6.37 BILLION
13. KIA		\$5.83 BILLION
14. LAND ROVER		\$5.07 BILLION
15. MINI		\$4.96 BILLION

SUDOKU # 5742

TELANGZUBA # 5741

	2				6				4	2	9	8	7	3	5	1	6
	3	6				7	9		3	5	6	2	1	9	8	7	4
	7	1			8			6	1	8	7	5	6	4	2	3	9
		8	7	5	3		1	4	5	9	4	3	2	8	1	6	7
3	4			8					7	6	8	9	5	1	4	2	3
		5	6	9	4	8	7	3	2	3	1	7	4	6	9	8	5
9		3	5			6			6	1	2	4	9	7	3	5	8
7	5		2		1			8	9	7	3	1	8	5	6	4	2
1			8	3	9			7	8	4	5	6	3	2	7	9	1

OJANG LUTEP # 5289

IPE	:	
ASSA	:	
ERÜMK	:	
UTSMEJÜ	:	
MTREMETEA	:	
NGATARI	:	
ÜKTEMERTER	:	
YÜBUTSA	:	
NGNU	:	
ANATEJ	:	

OJANG LUTEP TELANGZÜBA # 5288

SHIBAI TAKOK ASER TAJUNG DANG YIMLAA LIDIR
PARNOKJI TAMASHI ASÜTSÜ

TAN HOPTA ATEMA - KOMA SÜLA ?

Q. Asenok kidang kilir ayuba yimya ya anen nunga koma süla ?

Olong 20shi nung January 22, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Pune, January 21, 2021: Brihostibar anepdang yakta Serum Institute of India (SSI), Pune nung mi lendong atalokba tesem nung mokozü adokba noksa nung angur. Iba mi lendong nung nisung pongu süogo. SSI ya coronavirus vaccine 'Covishield' yangluba facility lir.

Budget senden jelia Jan. 30 nü Centre-i party ajak senden ayonger

New Delhi, January 21 (Agencies): February 1, 2021 nü Parliament nung Budget senden tenzüksü lia Modi-i aniba sorkari January 30, 2021 nü yimtenren party ajak senden ka ayongzükogo, ta ketdangsertem osang ka ajanga metetdaksü.

Centre sorkari party balala nungi Parliament House anaprongla nung aliba lenirtem January 30 nü anügdang 11:30 nungi senden nung adentsü jaokogo.

Kasa anogo nungjisa BJP-i

aniba NDA teloktep nung dena aliba party tema senden ka amentsü.

Coronavirus wara lia Parliament nung Budget senden ya shilem ana küma lemsar January 29 nungi February 15 tashi aser March 8 nungi April 8 tashi amentsü.

Party ajak sendenji Ato kilonser, Narendra Modi leniba nung amentsü, aser senden nung Defence Minister Rajnath Singh, Home Minister Amit Shah, Rajya Sabha nung BJP lenir Thawarchand Gehlot,

Deputy lenir Piyush Goyal, Parliamentary Affairs Minister Prahlad Joshi, Arjun Ram Meghwal aser V Muralitharan nung adentsü.

Budget senden nung ghonda ka Question Hour alitsü; yaküm September ita nung tzüngluruwa mongpu Parliament nungbo coronavirus wara aliba agi Question Hour maliasü.

Tawa Lok Sabha nung Speaker, Om Birla-i, Parliament nung adentsüpur ajaki coronavirus tendangtsüla, ta metetdaksüogo.

Centre-i küm ka atema aluyimba ozüng tasen mebenoktsü melunger

New Delhi, January 21 (Agencies): Centre sorkari küm ka ser tasadang tashi aluyimba dak sendakba ozüng tasen asemprong mebenoki atatsü melunga lir, aser iba mapang tashi nungjibo telemtetba tajung ka dangi arutsüa akok ta shiogo, ajisüaka aluyimertemi ibaji agizüktsü asü magizüktsüar ano telemtetba magi, ta osang angazüker.

Osangbenertem den jembidang Union Agriculture Minister, Narendra Singh Tomar-i, "Aluyimertem unions den senden amendang sorkari tatembang telemtetba ka aginüa liasü. Sorkari aluyimba ozüng asemji küm ka ser tasadang mebenoki atatsü melunga lir, iba mapang tashi nungji külemi o lemtepba ajanga telemtetba

agitetsüa akok," ta metetdaksü.

"Senden nung aluyimertemi longkak aitba onük ajak bentetnüa liasü, sorkari aluyimertem longkak aitba anendaktsüner, ajisüaka aluyimer unions den maneni ken o lemteptsü. January 22 nü taruba senden tashi nungbo aluyimertem longkak aitba anentsü atema telemtetba agitettsü ni imlar. Aluyimertemi longkak aitba anenba anogoji India nung democracy atema takok anguba anogo ka asütsü," ta Tomar-i metetdaksü.

Brihostibarnü aluyimertem tsüngda senden mena telemtetba agiba sülen January 22 nü Centre sorkari aluyimertem den maneni senden amentsü.

Bodhbarnü Vigyan Bhawan, New Delhi nung aluyimertem unions aser sorkar na tsüngda senden terbenbuba mena liasü.

Brihostibarnü osangbenertem den jembidang Bharatiya Kisan Union (Ugrahan) Tir, Joginder Singh Ugrahan-i, "Sorkari küm ka ser tasadang aluyimba ozüngtem agiena atatsü benok. Onoki ibaji magizük saka sorkari mepishir asünungji maneni asüng onok senden mena iba atemaji o lemteptsü," ta metetdaksü.

Sorkarisa aluyimertem dang, sorkari affidavit ka nung ozüng asem agiena atatsü aser committee ka tentettsü atema zülur Supreme Court nem agütsütsü melunga lir ta benoka liasü, ta aluyimer lenir kati metetdaksü.

Doctor temi Modi aser lenirtem dang Covid vaccine agia sayutsü mepishir

New Delhi, January 21 (Agencies): India linük nung healthcare tsütsü mongintemia coronavirus vaccines agiyonga linük nung nisung aikati iba vaccine agitsü atema arendakba tali kümдар.

January 16, 2021 nü coronavirus vaccination tenzüka anogo nung healthcare workers lakh 2 dak temai iba vaccine agia liasü, ajisüaka vaccination tenzüka sülen anogo pongu jungaka iba vaccine agir ajak agi lakh 8 dang.

Tang ama anogo shia nisung ishikati dang iba vaccine agira healthcare workers crore 3 prongla iba vaccine agidangbo küm süiadoktsü.

Tawa osangbenertem senden ka nung NITI Aayog züngsem, Dr VK Paul-i health workers ajak dang iba vaccine agitsü atema mepishia liasü.

Iba vaccine agitsü atema aikati arendakba dak sendakba nung osangbenertemi asüngdangyaba mapang nung doctor aikati, yimtenren lenirtem aser MP temi melungsoa iba vaccine magira nüburtemi iba vaccine agitsü atema arendaktsü, iba denji külemi sorkari Covaxin vaccine nung timtem kecha maliba indang data metetdaksütsüla, ta shiogo.

AIIMS Resident Doctors Association Tir, Adarsh Pratap Singh-i, tanga linüktem nungbo nüburtem nem tamang

kadaktsütsü atema Tirtem aser Ato kilonser temi tama coronavirus vaccine agia sayur, ta metetdaksüü.

Singh-isa, "Ajisüaka tia maka, India nungbo yimtenren lenirtem, Ato kilonser süaka, Tir süaka, Health Minister süaka MP tem süaka shingaia iba vaccine tama agia sayutsü atema pei sasa memelungteter. Kechiba parnoki iba vaccine magir?" ta asüngdang.

India nung doctor temi ashiba agi, US Tir Joe Biden, taoba mapang tatong Tir, Mike Pence, US Speaker Nancy Pelosi, Singapore Ato kilonser Lee Hsien Loong, UAE Ato kilonser Sheikh Mohammed Bin Rashid Al Maktoum nung densema lenir aikati vaccine agia sayuogo, ajisüaka kechiba asen lenirtemibo arendaker? ta asüngdang.

Taoba mapang Lok Nayak Jai Prakash hospital nung RDA Tir, Dr Parv Mittal-i, "Linük nung nüburtemi shima aliba lenirtemi iba vaccine agia sayura frontline workers temia iba vaccine agitsü atema marendaktsü," ta metetdaksü.

Gurugram nung aliba Fortis Hospital nungi Dr Rahul Bhargava-i, "Asen Ato kilonser ya nisungtem puaba lenir ka lir. Pai jembiba sülen asenoki anidaker. Pai iba vaccine agia sayura lokti nung ajaki tarendak makai iba vaccine agitsü ta ni amanger," ta ashi.



East Medinipur district nung Trinamool Congress tongti aser West Bengal Chief Minister, Mamata Banerjee indang kürakyanglu ka yua aliba noksa nung angur. Taruba West Bengal assembly election nung Mamata Banerjee-i East Medinipur district kübok Nandigram nungi tokteptsü.

Karnataka nung doctor ka coronavirus vaccine agiba sülen asü

Shivmoga (Karnataka), January 21 (Agencies): Karnataka kübok Shivamogga nung doctor ka coronavirus vaccine agiba sülen anogo ana dang lirbo Bodhbarnü nija hospital ka nung süogo, ajisüaka sorkaribo arrshi küm 58 doctor ka asübaji vaccine agiba agi masü saka temelungjang tashidak agi asü, ta metetdaksü.

Dr Jayaprakash TA ya Subbaiah Medical College Hospital nung department of orthopedics nung senior resident doctor inyaka liasü. Hombarnü pa densema pa den külem inyakterem Covishield vaccine tua liasü.

District health officer, Dr Rajesh Suragihalli-i, Bodhbar anepdang doctor Jayaprakash

teku nung tashitsü atuba sülen hospital-i anir ao, pa temelungjang tashidak agi asü, ta metetdaksü.

Jayaprakash indang cardiologist, Dr Nagendra-i, 2013 küm nungi pa dak temelungjang dak sendakba timtem liasü, pa vaccine agiba agi masü saka temelungjang tashidak agi asü, ta ashi.

Subbaiah Medical College nungi Dr SM Katti-i, "January 18 nü pa den külemi ni densema onok aika vaccine agia liasü, aser onok ajak temang junga dang lir. Vaccine agiba sülen Jayaprakash-i social media ajanga noksa lemsatepba den külemi frontline warriors ajak dang iba vaccine agitsü ajungshia liasü," ta metetdaksü.



January 21, 2021 nü Vijayawada nung ration door delivery vehicles tenzüksüba sentong nung Andhra Pradesh Chief Minister, YS Jagan Mohan Reddy adenba noksa nung angur.

Joe Biden-i policy kar melenshitsu; Paris Accord nung adentsü



Washington, Aenjeti/January 21 (Agencies): US President Joe Biden-i Bodhbarnü mapa belenzükba sülen mapang tatsüka dang lir executive actions 15 nung sign süogo aser iba ajanga taoba tir Donald Trump-i benoka aliba policy kar magi kümdaktsüba den wara aser tzü-mopung melenshiba dak sendakba nung mezüngbuba jenjang agiogo.

Oval Office nung Bodhbarnü osangbenertem matsüngdang inyakyim ka nung sign asüba mapang Biden-i executive order, memorandum aser tetuyubatem agütsütsü atema mapang mintoktsüla, ta ashi.

"Tanü ni sign asütsü aliba executive actions tem ajanga COVID ajanga mepetmesü

adokdaksür aliba jenjang melenshitsu asoshi teyari agütsütsü. Tzü mopung melenshiba dak sendakba nung asenoki tang tashi nung inyakdanga maliba sentongtem benoka inyaksü aser kin ajak nem jenjang kasa agütsütsü atema jenjang tapet agitsü. Item ajak ya tetenzüker dang lir," ta Biden-i ashi.

Biden teyarir kati, Democratic tir-i sign asüba action tem rongnung federal property nung aser federal employee tem ajak mask asemstüba, coronavirus dak sendakba nung tongteprateptsü atema White House office nung telok ka tentetsüba aser World Health Organization nungi atsüngintsü atema

China-i Pompeo densema US nunger 28 nem tenokdangba agütsü

Beijing, Aenjeti/January 21 (Agencies): Beijing anema inyakba atema China-i, taoba Secretary of State Mike Pompeo densema US nunger 28 nem tenokdangba agütsütsü telemtetba agiogo, ta Foreign Ministry otongdar kati Brehostibarnü ashi.

Pompeo dak alaka Peter Navarro (incumbent Director of the Office of Trade and Manufacturing Policy), Robert O'Brien (taoba National Security Adviser), David R. Stilwell (taoba Assistant Secretary for the Bureau of East Asian and Pacific Affairs), Matthew Pottinger (taoba Deputy National Security Advisor), Alex Azar (taoba Secretary of Health and Human Services), Keith J. Krach (incumbent Under Secretary of State for Economic Growth, Energy, and the Environment), aser Kelly Craft (taoba Ambassador to the UN), John Bolton (taoba National Security Advisor) aser Stephen K. Bannon (taoba White House Chief Strategist) nunger nem tenokdangba agütsüogo, ta Xinhua news agency sangdong ka ajanga metetdaksü.

Otongdang-isa, US-i China dak sendakba ken o tem nung jenjang balala agiba nung item nisungtem yagi tongti shilem agia liasü, ta ashi.

"Item nisungtem aser parnok kinungertem China Hong Kong aser Macao-i aittsü memelatsü.

"Parnok den sendaktepba aliba company aser institution tema China den shishilembatsü tenokdangba agütsüogo," ta otongdari ashi.

"Taoba küm ishika tsünga US nung China anemba yimden yimsüsürtemi parnok ajangzüksü atema aser China sempaba aser China aser America nunger tejangraba kecha hau ta maliba sayua jenjang balala benoka inyakba ajanga China inyakyim nung minprong agütsüogo aser iba ajanga China tejangraba dak kongshiba den China nungertem jashidaktsüogo aser China o US na tesendaktep raksatsüogo," ta Foreign Ministry sangdong ka ajanga metetdaksü.

"China sorkari China indang national sovereignty, security aser terenlok kümzüka ayutsü atema bendanga agütsür lir," ta otongdari ashi.

inyakyaktepa aliba agintsü densema lir, ta ashi.

Kasa mapang nung Biden-isa, Paris climate accord nung US tanaben adentsü atema kuli kaket ka nung sign süogo aser tzü mopung melenshiba azüoktsü atema tetuyuba ka agütsüogo, kong Keystone XL oil pipeline atema tir-i temelaba agütsür aliba agintsü densema lir.

Immigration dak sendakba nung Trump-i Mexico arrtsü nung jara yanglutsü atema senotsü teyari agitsü asoshi emergency benoka aliba Biden-i agintsüogo aser Muslim linük kar nem senzusenpong atema tenokdangba agütsür aliba agintsüogo. Mezüngbuba executive actions tem tetenzüker dang aser Biden-i ano jenjang aika agitsü, ta pa indang press secretary, Jen Psaki-i ashi.

Rongsenketsüng dak sendakba nung Biden-i, .S. Centers for Disease Control and Prevention dang March ita madem tashi evection dak sendakba nung moratorium ka atsülangtsütsü aser Department of Education dang September ita tashi kaketshirtem nem parnok indang loan maodaktsütsü shiogo.

Portugal nung School tem shibangtsü asateper

Lisbon, Aenjeti/January 21 (Agencies): Coronavirus tashidak tali prokshia aoba nokdangtsü atema Portugal nung kindergarten, school aser universities tem Hokolbarnü nungi shibangtsü atema sentong yangludar, ta Lusa news agency aser Publico osangkaket sangdong ajanga Brehostibarnü metetdaksü.

Portugal nung taoba kümbo tashidak kanga junga azüoktetogo, saka taoba anogo tenet tsünga tashidak menar aser asür aika kümogo, ta ourworldindata.org, -i metetdaksüogo.

Sorkar otongdar kati ashiba agi, wara azüoktsü atema sorkari inyakyim tasen benoktsü sentong yangludar, ajisüaka osang tejangja magütsü.

Sorkari tetuyuba agütsüba matai local ketdangsurtem kari tsürapurtem dang pei chirnurtem kidang nungi meyoktsü metetdaksüogo.

"Kokra ner tanurtem school-i teyok. Wara azüoktsü atema mapa kanga tongtibang lir," ta Cascais municipality mayor Carlos Carreiras-i Facebook nung zülutsü.

Taoba hopta tenokdangba

agütsüba kübok, non-essential services ajak shibangtsüogo aser nüburtem dang ki toktsür maotsü mepeshia metetdaksüogo, ajisüaka sorkari tang tashi school tem shibangtsü tetuyuba agüja mali.

Tsürapur, kaketshirtem aser opposition party temi sorkar dang school tem shibangtsü atema mepeshia aruogo.

Sorkari linük nung tashidak kanga kara prokshia aoba ya Britain nung poktetba tashidak dak tongloktsüogo, ajisüaka health experts temi renema mataba aser medical staff peria maliba dak tai tongloktsüogo.

Bodhbarnü anogoshia coronavirus tashidak potetba shilem 40 küma nisung 14,647 dak tashidak potet aser doctor temi health system jireptsü ana nung lir ta tekümdangtsü metetdaksüogo.

COVID-19 tashidak potetertem shilem 20 bo kanga kara menatepa aoba tapu tasenba lir aser taruba hopta tashi nungbo shilem 60 ajungtsü akok, ta Health Minister Marta Temido-i Bodhbarnü broadcaster RTP dang ashi.

Alima penzürtem nem Sri Lanka semdangtsü temelaba agütsü

Colombo, Aenjeti/January 21 (Agencies): Wara poktetba ajanga ita 10 shi bendanger alima penzürtem nem Sri Lanka semdangtsü atema temelaba magütsü aliba Brehostibarnü lapoktsüogo. Kasa mapang nung Brehostibarnü nungisa asetkong nung international airport ana aliba nung inyakyim ajunga tenzükogo.

Covid-19 tashidak prokshia meyoktsü atema tetuyuba tasen agütsüba kübok alima penzürtem parnok linük toktsür maru tsünga ghonda 72 lia tashidak tenangtsüla aser Sri Lanka nung parnok anenzükdak hotel tonga aruba sülen aser

anogo tenet lir tashidak tendangtsü nüngdaker. Parnok ajak tourism zones 14 nung benoka aliba "travel bubble" kübok alitsüla. Raliwalirtem anenzüksü atema hotel 180 shi mekazüka tokja lir.

December 26 nü nungi tenzükba pilot project ka kübok Ukraine nungi alima penzür 1,500-i Sri Lanka semdang aser parnok ajak iba amala mesükba travel bubble kübok inyaksangshia liasü, aser tang maneni linük nung iba dak ajemdaker tourism tenzükshir.

Sorkari taoba küm March ita wara poktetba sülen linük nung tourism shibangtsü. Sri Lanka

nunger meyipa arutsüba dak alaker international airport tem shibanga ayu.

Sri Lanka nung tourism ya kanga tongtibang lir aser iba ajanga gross domestic product nung shilem 5 shi teyari agütsür aser nisung 250,000 indang indanga mapa anguba den nisung million 3 shi iba ajanga tajangzük agütsür.

Sri Lanka nung October ita süoshi arba factory ka aser ango shishilembadak ka nung tashidak menatepa mao tsünga nisung 4000 tekübok dak dang coronavirus tashidak poteter liasü. Brehostibarnü tashi nung nisung 55,000 tema dak tashidak potetba jangjaogo aser nisung 274 süogo.



Serum Institute of India nung yangluba AstraZeneca/ Oxford University vaccine bena aliba pongdangtem Tribhuwan International Airport nung Nepali Health Minister Hridayesh Tripathi aser Nepal dangi India ambassador Vinay Mohan Kwatra nati asadangba noksa nung angur. india-i Nepal dangi coronavirus vaccine dose million 1 Brehostibarnü yokogo. Iba sempet yagi kidanger linük ana tsünga mangatettep aliba yanglushiba nung teyari agütsütsü imlar.

India nung BMW 3 Series Gran Limousine saya



New Delhi, Aenjeti/January 21, 2021 (Agencies): BMW-i India nung 3 Series Gran Limousine sayaogo. Iba gari - base petrol 330 Li Luxury Line variant jenjang sen lakh 51.50 (ex-showroom) aser 330 Li M-Sport First Edition jenjang sen lakh 53.90 (ex-showroom) alitsü.

3-series Gran Limousine design ya 3-series ama alitsü, saka cabin tuluba atema

wheelbase ajungkettsüogo. Iba 3-series limo nung wheelbase ji 110mm agi talangba lir, koba segment nung sedan talangtiba asütsü. Iba dak alia tanungba feature kar, taoba model ama alitsü.

Gari tejaklen, BMW kidney grille tuluba inoktsüogo, koba chrome den chrome slats metongi inokja lir. Iba den külemi, twin LED headlights den DRLs angutsü. Gari sporty

ngudaktsütsü atema, tejaklen horizontal T shaped air intakes keta lir.

Iba sedan nung 17-inch V-spoke alloys den dual chrome mufflers, large wraparound tail lamps, horizontal T-elements aser spoiler boot inoksema yanglutsüogo.

Feature tsütsü reprangdangra, 3-series gran limousine nung ambient lighting, 3-zone climate control, 12.3-Inch digital instrument cluster, 10.25-Inch centrally mounted touchscreen infotainment system, wireless charging aser tanga aika angutsü.

Gari ya engine option ana angutsü. BMW 3-Series Gran Limo - 2-litre twin turbo petrol unit ajanga 258 bhp den 400 Nm torque aser 2.0-litre diesel unit ajanga 190 bhp aser 400 nm torque agütsür. 3-Series ama engine anaprongla nung 8-speed gearbox inoktsüogo.

ADC Tening-i senden ayongtsü

Tening, Aenjeti/January 21, 2021 (TYO): Aruya aliba Republic Day 2021 atema, Hokolbar (22.01.2021) anepdang 11:00 ako meta Town Hall, Tening nung Additional Deputy Commissioner Tening, Rhosietho Nguori, NCS-i senden ka ayongzüktsü, ta sangdong ka ajanga metetdaksü.

Tening Headquarters nung 72buba Republic Day anogomung dak sendakba nung jembishinütsü asoshi iba senden nung office tekolakpur ajak medema aruagi adentsü asoshi ADC-i tetuyuba

agütsüogo.

Tanga sangdong ka ajanga, Additional Deputy Commissioner Tening, Rhosietho Nguori, NCS-i, nija atema lenmang yanglurtem dang, lenmang yangluba mapang Tening Town telungtet nung nübur senzüba lenmang raksatsüba aser tzü aolen (nullah/drainage) nokdangba dak sendakba nung tekümdangtsü agütsüogo.

Tzü aolen nokdangba ajanga, tzüngluruwa mongpu nung lenmang raksatsür, anentsüh aludaktsür aser tanga timtem aika adokdaksür. Tzünglu tzü aser tanga nungi

indokba tzü sadema aotsü asoshi tzü aolen (drainage system) ya kecha agia menokdangtsüla, ta kasa tetuyuba nung shia lir.

Tening Town telungtet nung aliba lenmangtem aser lokti/nija kiojentem raksaba nokdangtsü aser tongtibangsa nübur ajak kümzüka yutsütsü asoshi iba tetuyuba ya agütsür.

Lenmang raksatsütsüsa aser tzü aolen nokdangtsüsa, Tening Town telungtet nung nija/telok shingaia maparen meinyaktsüla. Nija/telok kari danga iba tetuyuba nung aibelenra, temerenshi agütsütsü, ta ADC-isa metetdaksü.

February 05 nü "Monster Hunter" sayatsü

Mumbai, Aenjeti/January 21, 2021 (Agencies): Film yanglur, Paul WS Anderson indang "Monster Hunter" ya February 5 nü India nung sayatsü. Iba film nung actor Milla Jovovich-i tongti shilem agiba angutsü.

Sony Pictures Entertainment sangdong ka

ajanga angazükba agi, iba film ya Hindi, English, Tamil aser Telugu oshi nung 3D aser IMAX nung sayutsü.

Milla dak alaka, iba film nun Thai star Tony Jaa-ia shilem agiba angutsü. Iba project ya Capcom indang nüngtugu video game franchise Monster Hunter

nung ajemdaker yangluba film ka alitsü.

"Monster Hunter" nungsa Tip "TI" Harris, Meagan Good, Diego Boneta, Josh Helman, Jin Au-Yeung aser Ron Perlman nungeri shilem agiogo. December 18, 2020 nü United States nungbo iba film sayaogo.

MULUNG NEN O



Asoba Anogo
Sept, 10, 1922

Tasüba Anogo
Jan. 17, 2021

"Shir mulungsentsü merükmerüka ali parnok temoatsüba; kechiaser parnoki Tsüngrem angutsü" Mathi 5:8

Ozü temeimba asür **MOARENBA YADEN** (Merangkong) Pa nem Tsüngremi arishi küm 99 tashi temjena moatsür January 17, 2021 anepdang Kibubai teti anisüngzükdaki jar ogo. Pa anogo ishika shirangba mapang nungi akümüli wadang atemba anogo tashi anüng nung mepet tanak sülok ama onok shisabulu aser mangyim tia nung alidang, lokti tentet, Arogo, aser kija kibong shirisa sarasadem nüktzü, nübu, ali rongsen aser shisatsü agi ozü mulung süngzükdakja yariogo, nenok ajak dangi tsüngdong marutet nung iba zülü ajanga nenok ajak dang kangasa pelaba lemsateper. Temoatsüba Tsüngremi mapa tajung asoshi nenok ajak moshia moajang ta kinungertem ajaki sarasademtsür.

Temeim Kinungtsü, Chirnurtem, Semchirtem.

Assam Rifles-i Wangti yimtsüng nung teyari agutsü



Dimapur, Aenjeti/January 21, 2021 (TYO): HQ IGAR (North) kübok Assam Rifles indang Tuensang Battalion-i Mongolbarnü (19.01.2021) Mon District kübok Wangti yimtsüng nung tekolakpur matsügdang arishi küm 110 tain tambur ka nem Wheel chair agütsü, ta sangdong ka ajanga metetdaksü.

Kasa mapang, yimtsüng nung tantsür-tambur, tangar memenep/mata mabensar, tsürabur malir aser tetsürtem, shirnok meta talanglang nung aliba mozüki bushia aotsü timtemer, parnok nem teyari

agütsütsü asoshi Assam Rifles-i medical camp ka ayongzüktsü. Iba camp sentong nung yimer 56 shi ajangzükogo. Medical Camp nung manemertem nem angati mozü lema agütsüba den külemi mapang shia mozü agütsü aser merükmejua alitsü asoshi tesayuba agütsü.

Assam Rifles pur sentong ya Wangti yimtsüng nung tekolakpurtemi pelashishia agizük aser tang ama mapang, nübur asoshi bilemja iba ama sentong ayongzükba atema yimertemi Security Forces dang pelaba metetdaksüogo.

78Bn.CRPF-i Civic Action Program ka ayongzük

Kohima, Aenjeti/January 21, 2021 (TYO): Nübur aser CRPF personnel tsünga tesendaktep tajungba yanglutsü asoshi, Brehostibarnü (21.01.2021) Old Community Hall, Zubza, Kohima nung 78 Bn. CRPF-i Civic Action Programme ka ayongzük.

Shri Randeep Datta, PMG, IGP M&N Sector aser Shri Syamchand De, DIGP (Ops) CRPF, Kohima nati iba medical camp ayongzük, kong Leizha 'A' Colony, Sechu PS- Zubza, Dist-Kohima, Nagaland nung alirtem nem nüngdakba mozütem aser ajok (walking stick) 05 lema agütsü.

Syamchand De, DIGP (Ops) CRPF, Kohima-i, iba Civic Action Programme ayongzüktsü

maongka anguba atema pelaba lemsatep aser CRPF-i pei wadang inyakba dak alaka, teti dang nübur den amalitepa inyaksangshitsü aser nüngdakba teyari agütsütsü asoshi pai nangzük.

Nagaland nung 78 Bn. Central Reserve Police Force tenzüker külen nungi, mapang shia parnoki sentong balala ayonga agia arudar aser nüburtem timtem metokmeperiba angadanga lenmang balala ajanga nüngdakba teyari agütsüdar. Bijender Kumar 2 I/C, Commandant 78 Bn., (AOL)-i, CRPF aser nübur tsünga tesendaktep tajung aliba asoshi Leizha 'A' Colony, Sechu, Zubza indang yimertem aser kidanger yimtsüngtem dang pelaba metetdaksü.



Peren, Aenjeti/January 21, 2021: BBBP week nüngtem nung school züngtur/tom nungi school toktsür alir tetsürtem tanaben tenüng zülüoka school azüngtsü ayongzükba Brehostibarnü (21.01.2021) ADC Office Jalukie nung sentong ka agiogo. Iba sentong nung WWO Peren menden liasü aser EAC & BBBP Peren indang Nodal officer, Sukhalu Chishi ajanga sentong moatsü.

Juventus-i Italian SuperCup kokogo



Aenjeti/January 21, 2021 (Agencies): Bodhbarnü (20.01.2021) Coppa Italia aser Serie A asayamung takok angur telok ana tsüngda Italian SuperCup final asaya nung Cristiano Ronaldo aser Alvaro Morata nati goal ka ka idakja, Juventus-i Napoli madak goal 2-0 agi takok nguogo.

Napoli, shirnoki taoba season indang Coppa Italia asayamung takok angutsü asoshi Juventus tsükdaktsü, tan SuperCup final asaya mezüng half nung goal 1-0 agi Juventus tejakdang ser asayatsü maongka angu, saka Napoli nungi Hirving Lozano kolak agi tongoktsüba ball ya Juve goalkeeper Wojciech Szczesny-i kanga danga junga ajepzük.

Cristiano Ronaldo-i pa indang goal 750buba idaktsüba den Napoli madak goal 2-0 agi akokba ajanga Juventus puri Italian Super Cup tukubu takok ngua record yangluogo.

Asaya atemtsü lia, Lorenzo Insigne-i penalty metsüpetba ajanga telok ana tsüngda mapang talila asayatsü maongka mangu aser Juventus nungi Álvaro Morata-i goal tanabuba metsülokja parnoki iba asaya takok angu.

"Iba asaya akokba atema ni kanga pelar aser coach ka ama iba takok marok mezüng anguba ya ni asoshi konang lie," ta Juventus coach Andrea Pirlo-i ashi.

Juventus-i Super Cup title tukuben buba takok nguogo aser parnok sülen iba asayamung timtiba takok angur telokji AC Milan alitsü, koba title ana agi Juve memenep lir.

Deobarnü Serie A asaya ka nung Inter Milan-i Juventus madak goal 2-0 agi takok anguba ajanga, final asaya nung Pirlo kanga shisabulua liasü.

"Iba asaya tasak liasü, saka team-i tensa junga asadanga temulung agütsür asayatsü lemtet aser onoki tongtibang asayamung ka takok angu; aser ibaji ajanga onok tali

ajungmesor. Tang, iba asaya nung ajemdaker onoki taruba asaya asoshi meranga inyaksü. League atemabo asaya telemsatem tasak alitsü, saka onoki tajungtiba nung asayatsü tebilemba lir," ta Ronaldo-i ashi.

Iba asaya kanga tasak liasü, kong telok ana tsüngda goal aika idaktsütsü asoshi maongka kangarabo mengutet, saka tanabuba half tenzüker minute 64buba nung Ronaldo-i penalty ka idaktsüba ajanga goal 1-0 agi Napoli tejakdang ser asaya.

Roanaldo-i penalty memetsüdang, Juventus-i corner ana tashi metsütsü maongka angu, saka goal meinoktsütet.

Weston McKennie-i asaya den mapet yimya benshia Dries Mertens alangdaktsüba sülen, asaya atemtsü minute 10 lia Napoli-i goal ka agi Juventus den meneptepa asayatsü asoshi penalty metsütsü maongka angu, saka Insigne-i goal post adena metsüdok.

Kasa asaya nung, Morata-i goal tanabuba meinoktsüdang, Napoli nungi Piotr Zielinski ajanga idaktsütsü merangba goal ka Juventus goalkeeper Wojciech Szczesny-i nokdangtet.

Asayamung tanga ka nung, relegation zone-i ayitsü lendongbang nung alir telok - Udinese aser Atalanta na goal 1-1 nung tembangba sülen, Atalanta pur Serie A nung jenjang tasembubai atutsü maongka mangu.

Iba asaya tenzükli, Roberto Pereyra-i Udinese atema mezüng goal idaktsü, saka half time atongtsü minute 1 lia Luis Muriel-i Atalanta atema goal ka metsüloktsü. Iba sülen telok kati danga goal meinoktsüteti, asaya draw nung tembang.

Tang, Serie A table nung Atalanta pur jenjang trokbuba nung lir, koba point kati 'top 4' nung alir telok memenep lir aser point 10 agi league nung temapur - AC Milan tesülen alitsü. Kasa mapang, Udinese

telok relegation zone nungi jenbotsüsa point 4 agi ajangzüktetogo.

Taoba küm December 06 nü telok ana tsüngda asayatsü remem, saka moapu nung tzi atüngdena aliba ajanga iba asaya athi.

Udinese-i iba league taoba asaya punga nungi asaya pezü nung tamakok nguogo aser anogo melenshir aliba asaya nung parnoki junga shilem agia liasü, kong asaya tenzükli dang second 23buba nung Pereyra-i Atalanta keeper Pierluigi Gollini tetsüng yongtsüda nung ball metsülokja goal idaktsü.

Atalanta-i iba asaya shilem timba amokbangadok, saka Udinese pur tesashiba asaya. Ajisiüaka, mezüng half matongdang, tesemdang team - Atalanta nungi Muriel-i goal ka idakja telok ana tsüngda goal 1-1 kümadok.

Asaya atemtsü minute 4 anünga lia, Udinese-i goal ka idaktsü, saka defender Marvin Zeegelaar-i Gollini dak asaya den mapet yimya benshia alangdaktsüba ajanga Marvin indang goal magizük.

Thailand Open: Sameer Verma quarter-i iogo

Bangkok, Aenjeti/January 21, 2021 (Agencies): Tang tasayadak aliba, Thailand Open nung India nung badminton asayar Sameer Verma-i maneni shilem tajung agia arudar aser Brehostibarnü, tebur kija asaya nung pai Denmark nung Rasmus Gemke madak takok ngua quarterfinal tongogo.

Super 1000 tournament tebur kija asaya nung Verma-i Gemke madak 21-12, 21-9 agi takok angu. Iba asaya minute 40 nung tembang.

Iba asaya tenzüker külen nungi Verma-i Gemke amokbangadok aser minute 20 matongdang, pai mezüng game koktet. Asayamung mezüng round nunga Malaysia nung seed 8buba Lee Zii Jia akoksang, Verma-i tanabuba game tajungba asaya aser pai kara kara dang 21-9 agi koka last eight tongtetogo.

Semi-final tongtettsü atema Verma-i World no.3 Anders Antonsen den quarter asayatsü.

"Iba asaya metenzükdang, kü dak teimla ka liasü. Bilemba ama ni asayaogo. Taruba round nung Denmark nung Anders Antonsen den asayatsü. Iba round nunga takok angutsü teimla nung asayatsü terenemba lir. Iba asaya tasak asütsü, saka ni tajungtiba agi shilem agitsü," ta Sameer-i ashi.

Mongolbarnü, tebur kija mezüng round nung Verma 18-21 agi Zii Jia makokba sülen, pai tanünga set ana 27-25, 21-19 atonga takok angu. Iba asaya ghonda 1 ser minute 14 nung tembang.

"Tanü asayaba ama iba asayamung tanünga asaya nunga maneni junga asayatsü imlar" ta Verma-i mezüng round koker sülen ashi.

Verma-i Asian Leg nung shilem agitsü asoshi osang mejangjai liasü aser iba asayamung atema terataba ka nung Bangkok tonga aru, ta pai ashi. Atangji nunga, Brehostibarnü India-i tanaben meyipa aotsü asoshi pai flight ticket mekaa ayu, ta BWF sangdong ka ajanga metetdaktsü.

Tetsür kija asaya round tanabuba nung Olympic silver medal angula, Sindhu-i Malaysia tsür world no. 92 - Kisona Selvaduray madak 21-10 21-12 agi takok ngua quarter final tonogo. Sindhu-i Thailand tsür Ratchanok Intanon mesüra Korea tsür Sung Ji Hyun den quarter final asayatsü.

Kasa asayamung, temeyoktep tarep asaya nung, India nung Satwiksairaj Rankireddy aser Ashwini Ponnappa nati Germany nung temeyoktep tarep Mark Lamsfuss aser Isabel Herttrich na tsükdaktsü sülen, Toyota Thailand Open Super 1000 tournament quarterfinals-i iogo. Rankireddy aser Ashwini nati kanga meranga toktep aser tenati iba asaya 22-20 14-21 21-16 agi takok angu. Iba asaya ghonda 1 nung tembang.

Mezüng game nung, India nung tarep yagi asaya amokbanga liasü, kong tenati tetokteper nem maongka magütsüi züklokja asaya aser 22-20 agi iba asaya koktet. Ajisiüaka, game tanabuba nung tenati bilemba ama masayatet aser iba nung world no. 17 nung alir Germany nung tarep yagi maongka agi aser tena nem points aika magütsüi 21-14 agi game koktet.

Tasembuba game nung, asaya tom ka tashi Mark aser Isabel na India nung tejakdang ser asaya, saka Satwiksairaj aser Ashwini nati tezü metangi temulung agütsür asaya aser iba asayamung nung maneni shilem agiyonga aotsü asoshi tenati 21-16 agi Germany nung tarep tsükdaktsü.

Brehostibarnü, India aser Germany nungi temeyoktep tarep ana ya masayadang, 2018 Badminton World Championships asayamung nunga parnok asaya liasü, kong India nung tarep yagi tena madak takok angu.

Temeyoktep tarep semifinal tongtettsü atema, Satwiksairaj aser Ashwini nati Malaysia nung Chan Peng Soon aser Goh Liu Ying na den quarter asayatsü.

Assam Rifles-i volleyball ayongzük



Dimapur, Aenjeti/January 21, 2021 (TYO): HQ IGAR (N) tawabangba kübok, Assam Rifles indang Kiphire Battalion-i Brehostibarnü Pungro Town nung friendly volleyball match ayongzük. Iba tesem nung lanurtem tsüngda saisapong tsütsü

ajungmesotsü nükjidong yur Assam Rifles indang civic action mapatong kübok iba volleyball asaya ayongzüka

liasü.

Iba friendly volleyball match ya Pungro Town Youth aser Pungro COB indang sepaitem tsüngda ayonga asaya. Telok ana tsüngda kanga dang jangrabangra asaya aser tongtibangsa asayar ajaki asaya sempet tajung sayuba den yimya tajung amshia asayaogo.

Asaya ka ajanga nübur den tesendaktep tali akangshiteptsüsa iba ama sentong ayongzükba atema lisopurtemi Assam Rifles dang kanga pelaba metetdaktsüogo.

BILEMDANGANG

"Telok nung semloker tajung aliba agi rongrong makai sünepa bener oteter."